

# PIREMÕ

## Paoro Iokanatsopatakiti Piremõmoni

---

<sup>1</sup>Nota Paoro. Kateia āki naua, Kristo Xesosi sākire nauikini xika. Nota, aītari Tximótxiokata aiokanatsopata pitemoni Piremõmoni. Ate iteene tiretai pite. Atekata parīkauatakari pitxaua. <sup>2</sup>Aiokanapireta Xesosi sākire auiākanimoni, paapoko apotiitakanimoni. Aiokanapireta aītaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

<sup>3</sup>Aīri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

### Piremõ Tiraōkiuatini Pirena

<sup>4</sup>Nitari Piremõ, Teoso nimisākiretakasaaki, ātipirika nisākirauata pite īkapani. Nisāpiretari Teoso ereka inini, kotxi iua kamaerekatai pite. <sup>5</sup>Ikara atoko itxa nisākire, kotxi nikenakopiretari iteene pauikiniri Apiananiri Xesosi sākire. Nikenakopiretari ikinimane kākiti Teoso nakitiakori pitiretini. <sup>6</sup>Nimisākiretari Teoso pite īkapani, kotxi ninirekari pisāpiretiniri pauīākiti sākirextiti ikiniōtika apanakinimoni, ininiākara pimarotari ikini sereti erekari Teoso siākiti Kristo nakitiakorimoni. <sup>7</sup>Ate poxokoniyata, kotxi pite tiretana kākiti Teoso nakitiakori. Pitiraōki iteene sikataparaxiniretaua ate. Pite aītari kamapoxokonitana Teoso nakitiakori ākixinire.

### Paoro Amanaãkiti Säkiretxiti

<sup>8</sup>Kristo sikaposotiiretano, ininiã nitapararitika niposotapitikari nipaniãtini atão inakari pikamini. <sup>9</sup>Iuaritika nitapararitika na nipaniãtai atão inakari pikamini. Nõtãkikai Kristo tiraõkiã pikaminiri atão inakari. Nota Paoro kiomãtxipekano. Kateia ãki nauanãta, Kristo Xesosi sãkire nauikini xika. Notakara õtãkikai pite atão pikamini. <sup>10</sup>Nota amanaãi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisãkire uai kateia ãki nauakasaaki. Uatxa iua auikari Xesosi sãkire. <sup>11</sup>Nimarotari iuãka poparĩkari uãka itxaua. Mitxi !iparĩkauata, pitekata auakasaaki. Paiariniri. Uatxa poparĩkari itxapekua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

<sup>12</sup>Niokanatariko Onésimo, ikanapiriini pitemoni. Ininiã papakapariko iua. Nitiretari iua nota niĩto nitiretini atokokana. <sup>13</sup>Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia ãki nauakasaaki, kotxi pite auini maioakari. Nota uai aua Teoso iokanapirena erekari nisãpiretini xika. <sup>14</sup>Ninirekamari Onésimo uai, txamari !ninirekari nikaminiri pite mauritakiniti. !Ninirekari nitapararitika nipaniãtini pauiritiniri Onésimo notakata ikaikotini. Pite nirekiniãri, imoianatano.

<sup>15</sup>Akokaxiti Onésimo miteka. Mapakanani itakanapai. Atxiĩti Teoso auiritari poiãoka itakanapini, ãtipirika pitekata iuaĩkana ikaikotini ĩkapani. <sup>16</sup>Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekua, kotxi iua auikari Kristo sãkire. Iteene nota tiretari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

<sup>17</sup>Nota pimoianari nininiãua, nota papakapini atokokana pitxariko papakapiniri iua. <sup>18</sup>Akokaxiti maerekati ikaminiã, ĩtiriuatiniã, pisãpiretano. Nota ĩkitxitaiko. <sup>19</sup>Nota Paoro, uatxa niuakoã niõkatsopataria sãkiretxiti. Notakarako ĩkitxitai pite. Pite imarotari pite xinire auãki inini, kotxi notara akokaxiti nisãpiretai Xesosi sãkire pauikini ĩkapani. Ininiã atxiĩti erekape pite ĩkitxitinino nota? <sup>20</sup>Ininiãkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nãkixinire, kotxi Kristo nakitiakori atxaua. <sup>21</sup>Niõkatsopataria pite ĩkapani, kotxi nimarotapitikari pikaminiri namanaãkiti. Ari, nimarotari apiata pikaminano.

<sup>22</sup>Apikomoni nitxai. Poeretari ereẽ nimakiniãtaã ìkapani. Hìte misãkiretapekari Teoso kateia nitakanapini ìkapani, ininiã nimarotari Teoso auiritano iuaìkana nikanapiriini hìtemoni.

### Itakapiretanapini Pirena

<sup>23</sup>Epápara inakori notakata kateia ãki aua, kotxi iua parìkauata Kristo Xesosi ìkapani. Iua xinikamanapitai hìte.

<sup>24</sup>Markoma, Arisitakoma, Témasima, Arókasima pakini notakata parìkauatakani, ninoa apaka xinikamanapitai hìte.

<sup>25</sup>Aãuìte Xesosi Kristo sikari ikinipoko erekari hãkixiniremoni. Ameẽ.